

# **Iniziative formative dal Cirf in grazie dai fonds de leç 482/99 CONSEGNÂTS I PRINS 18 ATESTÂTS DAL CORS “COMUNICÂ IN LENGHE FURLANE”**

## **A àn partecipât dipendents publics, dirigjents scolastics, gjornaliscj e ricercjadôrs**

A son 18 i corsiscj che a àn ricevût l'atestât di partecipazion ae prime edizion dal cors “Comunicâ in lenghe furlane” organizât dal Centri Interdipartimentâl di Ricercje su la culture e la lenghe dal Friûl (Cirf) de Universitât dal Friûl. Al cors, che al è durât 18 oris, a àn aderît dipendents publics, dirigjents scolastics, gjornaliscj e ricercjadôrs universitaris. La partecipazion e jere gratuite in grazie dai finanziaments de leç 482/99 su la tutele des minorancis linguisticis.

Il retôr Furio Honsell e la direttore dal Cirf, Piera Rizzolatti, a àn consegnât l'atestât di partecipazion al assistent aministratîf scolastic, Raffaella Sclabi; al coadiutôr aministratîf dal Istitût zooprofilatic sperimentâl des Vignesiiis, Marco Seravalli; ai dipendents dal Ateneu Claudia Amatulli, Tiziana Ambrosino, Roberta Corazza, Angela Miconi, Alessandra Montico, Mauro Sabbadini e Marco Sermonico; al dirigjent scolastic, Vilma Candolini; ai gjornaliscj Eddy Bortolussi, Andrea Marmai, Alessandro Montello, Francesca Fabriza Sordo e Primož Sturman; ai ricercjadôrs Luigina Di Giusto e Franco Finco, e ae sporteliste di lenghe furlane dal Comun di Bicinins, Barbara Malisan.

«In chest moment storic – al à dit Honsell – al è decisîf promovi la lenghe furlane e contribuî al sô sorevivi come lenghe veicolâr. Dome doprant il furlan come mieç di espression che al à une sô atualitât si contribuîs a tramandâ cheste ricjece aes gjenerazions che a vignaran». Lis lezions e lis ativitâts di laboratori a àn rivuardât la comunicazion intes lenghis minoritaris, il funzionament dai sistemis radiotelevisîfs e la produzion cinematografiche in lenghe furlane. I docents a son stâts Giuseppe Mariuz e Anna Bogaro. La iniziative e jere indreçade al personâl tecnic-amministratîf, ai docents e a dutis lis figuris professionâls dal Ateneu, ai dipendents dai ents e publichis aministrasions e, in particolâr, ai gjornaliscj e ai adets ae comunicazion.

Ae fin de cerimonie il retôr al à inaugurât il monitor trilengâl, talian-furlan-ingleês, dedicât ae comunicazion istituzionâl dal Ateneu, colocât inte jentrade di Palaç Antonini. «Un imprest – al à dit Honsell – che al zonte inovazion e grancj valôrs che a vegnin de storie e che scugnin jessi conservâts e tramandâts».